



Češki ambasador razbio i bocu šampanjca

(Foto: S. Jordamović)

Povodom početka predsjedavanja EU

Kudela pustio u promet evropski tramvaj

Ambasador Češke u BiH Jirži Kudela (Jiri) jučer je u krugu GRAS-ove remize u Sarajevu u promet pustio tramvaj oslikan motivima predsjedavanja ove zemlje Evropskom unijom. Bijeli tramvaj s logom koji čine slova u bojama zastava svih zemalja EU saobraćat će Sarajevom cijelu godinu.

- Presretan sam što nam je GRAS omogućio da ovaj stari češki tramvaj, koji je renoviran, dobije još jednu renovaciju - logo češkog predsjedavanja EU - rekao je Kudela. Ambasador je zatim uzeo bocu šampanjca i, razbivši je o tramvaj, pustio ga u promet. **A. Š.**

Štrajk bivših radnika „Granita“ iz Jablanice

Nezirić dobio otkaz mjesec pred penziju

Dvadeset otpuštenih radnika „Granita“ jučer je ponovo započelo štrajk gladu ispred upravne zgrade preduzeća u Jablanici. Među njima je i Refik Hindić, koji se prije nekoliko dana onesvijestio od gladi i hladnoće.

- Prioritet u našem zahtjevu, uz isplatu dugova, jeste uplata doprinosa za penzijsko-invalidsko osiguranje od 2000. godine - kaže Hindić. Najstariji među štrajkačima je Fadil Nezirić (58), demobilisani borac, koji je pred odlazak u penziju dobio otkaz, i to, kako tvrdi, zato što je putem suda pokušao naplatiti zarađeno. **H. M.**

Tijelo nađeno na putu kod Brčkog

Umro prije nego što je pregažen

Obdukcija je potvrdila da je Bono Filipović (67) iz Ulovića kod Brčkog najvjerojatnije umro od infarkta srca i bio je mrtav u trenutku kada je na njegovo tijelo automobilom „opel korsa“ naletio vozač A. D. iz tog mjesta, izjavio je sinoć portparol brčanske policije Halid Emkić.

Na seoskom putu u Uloviću preksinoć je pronađeno beživotno Filipovićevo tijelo, kome je automobil prešao preko nogu. **E. Ra.**

Upozorenje iz Vlade FBiH

Lažni Branković opet hara

Ured za odnose s javnošću Vlade FBiH obavijestio je građane da nepoznata osoba, predstavljajući se lažno kao federalni premijer Nedžad Branković, od menadžera uspješnih firmi, kao i načelnika općina u BiH i inozemstvu traži novčane priloge za liječenje djevojčice oboljele od leukemije. Ovih dana posebno je aktivan u Hrvatskoj.

Inače, ovo nije prvi put da se javlja „lažni Branković“ i pokušava iznuditi novac. Policija pretpostavlja da se radi o Petru Cvjetinoviću zvanom Pero, koji je nedostupan bh. policiji, a ranije se lažno predstavljao kao Sredoje Nović, Rajko Ubiparip, Zlatko Miletić.

Kao „lažni Branković“ se predstavljao i Alija Muharemović, koji zbog djela prevare već služi četverogodišnju kaznu zatvora. **T. L.**

Jučer u Beču

Davidović predao akreditivne ElBaradeiju

Novoimenovani stalni predstavnik BiH pri Ujedinjenim narodima, IAEA-i i OSCE-u ambasador Igor Davidović predao je jučer u Beču akreditivno pismo generalnom direktoru Međunarodne agencije za atomsku energiju Mohamedu ElBaradeiju. Davidović se zahvalio ElBaradeiju na pomoći koju Agencija pruža BiH.

Lajčak se susreo s Vajtmanom i Erikom

Neprocjenjiva uloga NATO-a u BiH

Visoki predstavnik u BiH Miroslav Lajčak jučer se oprostito od odlazećeg komandanta Štaba NATO-a u Sarajevu generalmajora Ričarda Vajtmana (Richard Wightman) i sastao se sa njegovim nasljednikom brigadnim generalom Sabatom Erikom (Errico).

Lajčak je istakao neprocjenjivu ulogu NATO-a u podršci bh. vlastima prilikom provođenja reforme odbrane i u procesu euroatlantskih integracija, saopćeno je iz OHR-a.

S Vajtmanom i Erikom jučer su se sastali i članovi Predsjedništva BiH Haris Silajdžić i Željko Komšić.



Susret u OHR-u: Eriko, Lajčak i Vajtman

SAD Kakva rješenja za Balkan priprema Obama

Specijalni izaslanici za BiH Gelbard, Hagel ili Dobins

Sigurno je da će Obama za širi region imenovati specijalnog izaslanika

Novi američki predsjednik Barak Obama (Barack) mogao bi uskoro imenovati specijalnog izaslanika za region zapadnog Balkana, uključujući i BiH, procjene su analitičara koji prate proces imenovanja nove američke administracije. „Herald Tribune“ jučer je objavio da će Obamina administracija, tačnije državni sekretar Hilari Klinton (Hilary Clinton), uskoro obznaniti imena visokih dužnosnika Stejt departmenta zaduženih za vanjsku politiku.

Krupni problemi

Među onima koje spominje ugledni list nisu osobe koje će biti zadužene za zapadni Balkan, s obzirom na to da se ne nalazi na listi prioriteta, ali se navodi da će nova administracija posegnuti za imenovanjima specijalnih predstavnika za posebne oblasti.

Kurt Basiner (Bassuener), politički analitičar Vijeća za demokratizaciju, pojašnjava za „Dnevni avaz“ da je specijalni izaslanik jedino rješenje za Obamu s obzirom na to da su relativno brzo potrebne odluke o BiH koje će biti teško donijeti bez SAD.

- Nema vremena da se čeka imenovanje kroz Kongres, jer do ključne sjednice Vijeća za implementaciju mira (PIC) za BiH nema još mnogo. Izvjesno je da će u



Basiner: Očekivanja od Bajdena i Holbruka

tom slučaju Obama, odnosno Klinton, imenovati specijalnog predstavnika koji odmah može početi da radi. Tako će uraditi i s Pakistanom, Bliskim istokom, Iranom - kaže Basiner.

Kada je riječ o zapadnom Balkanu, Basiner navodi da je osnovno pitanje to ko je od ključnih ljudi u Obaminoj administraciji dovoljno spreman da podsjeti da u moru krupnih problema u

BiH i na Balkanu ima još onih koji nisu riješeni.

- Može se očekivati da to učini potpredsjednik Džo Bajden (Joe Biden), ili eventualno Ričard Holbruk (Richard Holbrooke), koji poznaju situaciju. Ako oni to pitanje stave na dnevni red, bit će moguća dovoljno brza reakcija SAD do sljedećeg PIC-a - kaže Basiner.

Bivši ambasadori

Prema njegovim riječima, u diplomatskim i analitičarskim krugovima spominju se pojedinci koji bi mogli biti imenovani za specijalnog izaslanika za ovaj region. Tako je moguće da to bude neki od bivših američkih ambasadora u državama EU, a već su spomenuta imena Roberta Gelbarda, Čaka Hagela (Chuck Hagel) i Džima Dobinsa (Jim Dobbins).

- Gelbard je već dugo vezan uz Balkan, čak i poslovno. Mislim da zbog toga nije ozbiljno u igri. Dobins je ozbiljan kandidat, kao i Hagel, senator iz Nebraske - kaže Basiner za naš list. **T. LAZVIĆ**

Holbruk izaslanik za Pakistan

Kako navodi „Herald Tribune“, tvorac Dejtonskog sporazuma Ričard Holbruk bit će imenovan za izaslanika za Pakistan i Indiju. Denis Ros (Ross), veteran pregovora na Bliskom istoku, preuzet će Iran, a dvije osobe spominju se kao novi posebni izaslanici za krizni region na Bliskom istoku Ričard Has (Haass) i Denis Kurcer (Kurtzer).



Holbruk: Težak zadatak

Komisija za vrijednosne papire FBiH

Poništen izbor nadzornog odbora „BH Telecoma“!

Sada je na Vladi FBiH da ponovi tu proceduru, naglašava Čelam

Komisija za vrijednosne papire FBiH jučer je poništila izbor nadzornog odbora „BH Telecoma“. Predsjednik Komisije Hasan Čelam kaže za naš list da je takva odluka donesena pošto nije poštovana zakonska procedura propisana za održavanje Skupštine dioničara.

- Mi smo pažljivo analizirali cijelu situaciju i zauzeli stav da se procedura mora obnoviti zbog propusta na samoj Skupštini dioničara „BH Telecoma“, načina



Čelam: Zakonske procedure

glasanja predstavnika Vlade FBiH ali i malih dioničara. Sada je na Vladi FBiH, kao većinskom vlasniku, da ponovi tu proceduru - naglašava Čelam.

Predsjednik NO „BH Telecoma“ Samir Čaušević još nije dobio taj stav Komisije, a za „Dnevni avaz“ je kazao da „se tim potezom u pitanje dovode i odluke ovog NO u proteklih 30 dana“. On očekuje precizne instrukcije Vlade FBiH u novonastaloj situaciji. **Ad. H.**